

**ՀԱՅԱՍՏԱՆԻՆ ՈՒՂՂՎԱԾ ՄԱՐՏԱՀՐԱՎԵՐՆԵՐԸ
ԳԼՈՒԲԱԼ ԱՅՎՈՂ ԱՇԽԱՐՀՈՒՄ¹**

Գազիկ Հարությունյան՝

Առնուղ թոյնբիի դասական ձևակերպմամբ՝ քաղաքակրթությունների կենսունակությունը պայմանավորված է մարտահրավերներին ադեկվատ պատասխանելու նրանց ունակությամբ, և այդ առումով պետք է ամրագրել, որ Հայաստանն արդեն մի քանի հազարամյակ է, ինչ կարողանում է դիմակայել (այս կամ այն արդյունավետությամբ) իրեն նետված մարտահրավերներին: Մեկ այլ դիտարկում ևս. գլոբալացումն ուղեկցել է մարդկությանը վաղ անցյալից և ժամանակին ընդունել է, օրինակ, կայսերական տարածքների, այսպես կոչված, «լոկալ գլոբալացման/համահավասարեցման» տեսք և բովանդակություն [1, c. 80]: Սակայն մենք կանդրադառնանք գլոբալացման վերջին ալիքին, որի արդյունքում (ի թիվս այլ հանգամանքների) փլուզվեցին սոցիալիստական համակարգը և ԽՍՀՄ-ը: Այդ երևույթը, անշուշտ, աշխարհաքաղաքական, քաղաքակրթական, հումանիտար ու տնտեսական ադետ էր և այդ առումով՝ Հայաստանին ուղղված լրջագույն մարտահրավեր: Սակայն լինելով տարածաշրջանի ամենակայացած երկիրը (դա պայմանավորված էր առաջին հերթին մեր քաղաքակրթական, պետական և ռազմական ավանդույթներով ու Երկրորդ հանրապետությունում ձևավորված հոգևոր, մտավոր, գիտատեխնիկական-արդյունաբերական ներուժով)՝ Հայաստանն ադեկվատ արձագանքեց վտանգներին, հաղթեց պատերազմում Ադրբեջանին և ազատագրեց Արցախը:

¹ Հայ քաղաքագետների և միջազգայնագետների միջազգային գիտաժողովում (Երևան, 19-20 նոյեմբերի 2012թ.) ունեցած ելույթի հիման վրա:

՝ «Նորավանք» ԳԿՀ գործադիր տնօրեն:

Հայաստանը՝ տարածաշրջանի ամենակայացած պետություն

Անցել են տարիներ, և Հայաստանը (ՀՀ և ԼՂՀ) շարունակում է պահպանել տարածաշրջանի ամենակայացած պետության կարգավիճակը. սրանք լոկ խոսքեր չեն: Ինչպես հայտնի է, հեղինակավոր «Միջազգային հարաբերություններ» (*Foreign Policy*) ամսագիրը և Խաղաղության հիմնադրամը (*Fund for Peace*) ամեն տարի հրատարակում են չկայացած/ձախողված երկրների վարկանիշները (*Failed States Index*): Դրանք կազմվում են հատուկ մեթոդաբանությամբ, որի հիմքում ընկած են երկրների իրավիճակի՝ հակամարտությունների գնահատման գործիքաշարի միջոցով ստացված գնահատականները, որոնք և արտահայտվում են 12 ցուցիչների արժեքներում (տե՛ս *Աղյուսակ 1*): Ըստ այդ մեթոդաբանության, որքան կայացած է երկիրը, այնքան այն քիչ միավոր է հավաքում, այսինքն՝ վերջին տեղն է գրավում ամենակայացած պետությունը: *Failed States Index*-ի 2012թ. արդյունքները ներկայացված են *Աղյուսակ 2-ում*¹ (թվերով սյունակները համապատասխանում են *Աղյուսակ 1-ի* ցուցիչներին): Ինչպես տեսնում ենք, ունենալով էա-

Աղյուսակ 1

Failed States Index-ի ցուցիչներ

<i>սոցիալական ցուցիչներ</i>	
1.	ժողովրդագրական ազդեցություն
2.	փախստականների և ներքին տեղահանվածների զանգվածային տեղաշարժ
3.	դժգոհ զանգվածների գործոն
4.	մարդկային ռեսուրսի քրոնիկական և կայուն արտահոսք
<i>տնտեսական ցուցիչներ</i>	
5.	հասարակական խմբերի միջև տնտեսական զարգացման անհավասարություն
6.	կտրուկ և/կամ խոր տնտեսական անկում
<i>քաղաքական ցուցիչներ</i>	
7.	պետության քրեականացում և/կամ ապալեզիտիմացում
8.	պետական գործառույթների շարունակվող վատթարացում
9.	մարդու իրավունքների համատարած խախտում
10.	անվտանգության կառույցների ուժեղացում. նրանց հանդես գալը որպես պետություն պետության ներսում
11.	կլանային վերնախավերի ազդեցության մեծացում
12.	օտար երկրների միջամտություն կամ արտաքին գործոններ

¹ http://www.foreignpolicy.com/failed_states_index_2012_interactive

պես ավելի քիչ միավորներ, քան հարևանները, Հայաստանը մեծ առավելությամբ հանդիսանում է տարածաշրջանի առաջատարը, այսինքն՝ ամենակայացած պետությունը, ինչն արդեն տարիներ ի վեր դարձել է ավանդական այս հեղինակավոր միջազգային վարկանիշային համակարգում:

Հատուկ ուշադրության է արժանի 8-րդ ցուցի՝ «պետական գործառույթների շարունակվող վատթարացում» փոքր արժեքը, ինչը վկայում է, հարևանների համեմատ, զարգացած պետական կառավարման համակարգի մասին:

Աղյուսակ 2

Failed States Index - 2012

ԵՐԿԻՐԸ	ՏԵՂԸ	ՄԻԱՎՈՐԸ	ՑՈՒՑԻՉՆԵՐԸ											
			1	2	3	4	5	6	7	8	9	10	11	12
ԻՐԱՆ	34	89.6	5.8	7.6	8.6	6.4	6.7	6.4	8.8	5.3	8.9	8.3	9.3	7.4
ՎՐԱՍՏԱՆ	51	84.8	5.5	7.2	8.3	5.2	6.6	6.3	8.5	5.7	6.7	7.6	9.1	8.2
ԱՂԲԵՋԱՆ	68	79.8	5.6	7.6	7.2	5.1	6.6	5.2	8.0	5.4	7.3	6.7	7.8	7.2
ԹՈՒՐԿԻԱ	85	76.6	6.5	6.5	8.6	4.2	7.1	5.6	6.2	6.0	5.3	7.7	7.5	5.9
ՀԱՅԱՍՏԱՆ	102	72.2	6.8	6.8	5.7	6.3	5.9	5.6	6.8	4.7	6.8	5.2	7.0	6.1

Միևնույն ժամանակ, ինչպես հետևում է *Աղյուսակ 2-ից*, Հայաստանն ունի բավական լուրջ խնդիրներ սոցիալ-ժողովրդագրական ոլորտներում (1-4 ցուցիչներ), դրանց մենք դեռ կանդրադառնանք, երբ կդիտարկենք Հայաստանին ուղղված ներքին մարտահրավերները: Նկատենք նաև, որ կայացած պետություններում ամեն մի մասնագիտական ենթախումբ պետք է ձգտի կատարել իրեն բնորոշ ֆունկցիաները, և այդ առումով վերլուծաբանական հանրության առաջնահերթ խնդիրներից է կանխատեսել սպասվող մարտահրավերները և փորձել մատնանշել դրանց համարժեք արձագանքելու հնարավորությունները:

**Տարածաշրջանային ռազմաքաղաքական
հավասարակշռության հնարավոր խախտումը**

Վերոնշյալի համատեքստում խիստ ակտուալ է դիտարկել այն հայտնի իրողությունը, որ Իրանի միջուկային ծրագրի շուրջ ընթացող զարգացումների, սիրիական պատերազմի և «արաբական գարնան» համատեքստում ընթացող գործընթացների հետևանքով Մեծ Մերձավոր Արևելքը հայտնվել է, այսպես կոչված, «տուրբուլիզացիոն», անկայուն վիճակում: Տարածաշրջանային այդ նոր իրավիճակը մարտահրավեր է ոչ միայն հայկական համայնքներին, որոնց գոյությունն այսօր լուրջ վտանգի տակ է, և որոնց հնարավոր կազմալուծումը կարող է էապես փոխել հայկական սփյուռքի դեմքն ու բովանդակությունը: Այդ անկայունությունն անմիջականորեն վտանգում է նաև Հայաստանի անվտանգությունը, քանի որ որոշ սցենարներում Իրանի թուլացումը¹ կարող է խախտել տարածաշրջանում ձևավորված ռազմաքաղաքական հավասարակշռությունն ու հանգեցնել Թուրքիայի հզորացման՝ այն վերածելով տարածաշրջանային գերակայող ուժի [2]: Ուշադրության է արժանի նաև այդ երկրին վերաբերվող մասով *Աղյուսակ 2-ի* 12-րդ ցուցչի փոքր արժեքը, որը վկայում է օտար երկրներից Թուրքիայի նվազ կախման մասին և արտահայտում նրա ինքնուրույն գործելու ձգտումը՝ առանձնապես հաշվի չնստելով ՆԱՏՕ ավագ գործընկերների հետ: Նեոսոմանական գաղափարախոսությունով տոգորված թուրքական քաղաքական վերնախավն ավելի քան ամբիցիոզ է և հավակնում է ստեղծել՝

- «Իսլամական ՆԱՏՕ» և «Իսլամական խաղաղարար ուժեր» (այդպիսով վերակենդանացնելով Էրդողանի գաղափարական հայր, նախկին վարչապետ և ռադիկալ իսլամիստ Էրբաքանի ծրագրերը),
- միջուկային զենք,
- թուրքական լիրայի տնտեսական գոտի:

Ռազմական, քաղաքական և տնտեսական նման նկրտումներ ունեցող Թուրքիայի ձևավորումը լրջագույն մարտահրավեր է Հայաստանի

¹ Առանձին քննարկման են արժանի Իսրայել-Իրան հնարավոր միջուկային պատերազմի սցենարները (տե՛ս [1, c. 178]):

համար: Կասկած չի հարուցում, որ ԼՂՀ խնդրում անզիջում դիրք գրաված (այդ հարցում որոշ վերլուծաբաններ բավական հիմնավորված կերպով Թուրքիան համարում են հակամարտող կողմ) և մեր սահմանների շրջափակումն իրականացնող (ինչը համահավասար է պատերազմական գործողության) Թուրքիայի հզորացումն անխուսափելիորեն ավելի է կոշտացնելու Հայաստանի հանդեպ նրա ունեցած դիրքորոշումները: Առանձնահատուկ ուշադրության է արժանի նաև այդ երկրի միջուկային ծրագիրը, որի իրագործումը լրջագույն մարտահրավեր է ոչ միայն Հայաստանի, այլև Իսրայելի և Հունաստանի համար [1, c. 247, 3-5]:

Միևնույն ժամանակ, սցենարային դիտարկումները ենթադրում են համալիր մոտեցումներ, և այդ համատեքստում պետք է հաշվի առնել նաև «Թուրքիայի թուլացման և մասնատման» սցենարը [1, c. 179]: Պատահական չէ, որ այսօր վերլուծաբանական հանրությունում աշխուժորեն է քննարկվում ոչ միայն Սաուդյան Արաբիայի և Կատարի, այլև Թուրքիայի «վատ» ապագան: Դա ավելի քան հիմնավորված է, քանի որ այդ երկրում ընթանում են խմորումներ, որոնց լուծումներն առայժմ չեն նշմարվում. ակտուալացել և միջազգայնացվել է «քրդական հարցը»¹, իսկ հանրությունում խորանում է, այսպես կոչված, «ինքնության ճգնաժամը»՝ այստեղից բխող էթնոդավանական հակասությունների սրացումով: Ի լրումն՝ այդ երկրի ներկայիս իսլամական և նախկինում գերիշխող աշխարհիկ զարգացման մոդելների կողմնակիցների միջև ծայր աստիճան սրվել են գաղափարական-քաղաքական հակասությունները: Որոշ մեկնաբաններ հիմնավորված նշում են, որ վարչապետ Էրդողանի՝ նեոսամանիզմի վրա հենված ներկայիս ագրեսիվ արտաքին քաղաքականությունը նույնպես զգալի ռիսկեր է պարունակում (տե՛ս, օրինակ [6, 7]): Սակայն պետք է հաշվի առնել, որ անգամ նման թվում է, թե ցանկալի զարգացումները նույնպես յուրօրինակ մարտահրավեր են Հայաստանի համար, որոնց ադեկվատ արձագանքելու համար անհրաժեշտ է վաղօրոք նախապատրաստվել:

¹ Sté u, օրինակ, *Курдский лабиринт Турции*, <http://www.rodon.org/polit-121130105832>

**Հայաստանը որպես «սահմանային երկիր»
և «Գլոբալ կառավարման» սցենարները**

Բոլոր պարագաներում պետք է արձանագրել, որ Մերձավոր Արևելքում ընթացող գործընթացները որոշակիորեն ինտեգրում են *Իսլամական աշխարհը*՝ տարանջատելով այն *Արևմտյան՝ եվրոպական աշխարհից*: Դա հիմնախնդիր է այդ աշխարհի հետ անմիջապես սահմանակից Հայաստանի համար ոչ միայն այն տարբերակում, երբ այդ աշխարհում Թուրքիան սկսում է գերակայել, այլև հակառակը՝ երբ սկսում է զիջել դիրքերը: Մերձավոր Արևելքի երկրներում աշխարհիկ վարչակազմերի փլուզումը և հանրություններում ընթացող կրոնական ռադիկալացումը այդ տարածաշրջանը դարձնում են անկայուն և հետևաբար՝ ռազմաքաղաքական առումով անկանխատեսելի:

Հատկանշական է, որ նման միտման հնարավորությունը մատնանշվել է դեռևս 2010թ. ԱՄՆ Ազգային հետախուզական խորհրդի (*NIC*), ԵՄ Անվտանգության ինստիտուտի (*EUISS*), ինչպես նաև Ռուսաստանի, Չինաստանի և Հնդկաստանի փորձագետների կողմից պատրաստված «Գլոբալ կառավարում 2025» վերնագիրը կրող զեկույցում¹: Այդ զեկույցում, ի թիվս այլ կանխատեսվող զարգացումների, ուշադրության արժանի են հետևյալ սցենարները.

1. «Մասնատում»,
2. «Եվրոպական համերգի վերադարձ»:

«Մասնատում» հոռետեսական սցենարը, ըստ զեկույցի հեղինակների, ենթադրում է, որ աշխարհում սկսում են գերակայել «քաղաքակրթական մասնատման» միտումները, որոնք և հանգեցնում են տարաբնույթ հակամարտությունների: Մասնավորապես, Ասիան կառուցում է իր ուրույն աշխարհակարգը (ինչն ուղղակիորեն հիշեցնում է այն իրավիճակը, որն այսօր ստեղծվել է Մերձավոր Արևելքում «արաբական գարնան» հետևանքով), իսկ Եվրոպան մեկուսանում է և «խորանում սեփական հիմնախնդիրների մեջ»:

¹Global Governance 2025: At a Critical Juncture. National Intelligence Council, European Union Institute for Security Studies, September 2010, http://www.iss.europa.eu/uploads/media/Global_Governance_2025.pdf

Ավելի լավատեսական է 2-րդ սցենարը, որը ենթադրում է միջազգային հարաբերություններում Վիեննական (կամ, այսպես կոչված, «Եվրոպական համերգի») համակարգի վերականգնումը¹ (բնականորեն՝ միանգամայն նոր խմբագրությամբ): Այլ խոսքով՝ ստեղծվում է հզոր, միավորված Եվրոպա:

Զեկույցը կազմող փորձագետները (2010թ.) այս երկու սցենարները դիտարկել են միմյանցից առանձնացված, մինչդեռ այսօր առկա միտումներից ձևավորվում է տպավորություն, որ գլոբալ զարգացումները կարող են ընթանալ զուգահեռաբար: Դրա մասին են վկայում.

- Եվրամիության անդամ երկրների տնտեսական և քաղաքական համակարգերի ինտեգրման գործընթացները, որոնց արդյունքում հնարավոր է, որ ԵՄ-ը կայանա որպես միասնական և լիարժեք աշխարհաքաղաքական կառույց [8],
- Ռուսաստանի, Ղազախստանի և Բելառուսի նախագահների կայացրած որոշումը 2013թ. Եվրասիական միության (ԵԱՄ) ստեղծման մասին,
- Եվրոպական և հետխորհրդային առաջատար պետությունների քաղաքական և վերլուծաբանական հանրություններում ձևավորվող այն մտայնությունը, թե քաղաքակրթական առումով մոտ ԵՄ և ԵԱՄ երկրները պետք է համախմբվեն, որպեսզի կարողանան համատեղ դիմակայել «մասնատվող» աշխարհի մարտահրավերներին («Եվրոպական համերգի» սցենարի ավելի մասշտաբային ճյուղավորումը, որը ենթադրում է «Մեծ Եվրոպա» Լիսաբոնից մինչև Վլադիվոստոկ (ԵՄ + ԵԱՄ):

Այս ամենի համատեքստում ևս մեկ անգամ պետք է փաստել, որ Հայաստանը Իսլամական աշխարհի հետ սահմանային երկիր է, ինչն ակտուալացնում է մեր քաղաքակրթական և աշխարհաքաղաքական կողմնորոշումներին համապատասխան ռազմաքաղաքական ձևաչափեր տալու

¹ Այդ համակարգը ձևավորվել էր Մեծ Բրիտանիայի, Ռուսաստանի, Ավստրիայի և եվրոպական այլ պետությունների ներկայացուցիչների կողմից ձեռք բերված համաձայնությունների հիման վրա, 1815թ. Վիեննայի կոնգրեսում (Նապոլեոնյան պատերազմների ավարտից հետո): Այդ համակարգը բավական արդյունավետ ապահովեց եվրոպական երկրների, կարելի է ասել, «կոլեկտիվ անվտանգությունը» մինչև Դրիմի պատերազմը (1853թ.):

խնդիրը: Այդ քաղաքական անհրաժեշտությունը թելադրում է Հայաստանին առավել ակտիվ մասնակցել եվրոպական և եվրասիական ինտեգրացիոն գործընթացներին, ինչն էապես կբարձրացնի Հայաստանի անվտանգության մակարդակը: Հարկ է, սակայն, նկատել, որ հայկական վերլուծաբանական հանրությունում երբեմն կարելի է հանդիպել այն կարծիքներին, թե ԵՄ Արևելյան համագործակցության ձևաչափը և ԵԱՄ-ին անդամակցելու խնդիրը միմյանց հակասող գործընթացներ են: Ակնհայտ է, որ նման մոտեցումները ժամանակավրեպ են և արտահայտում են «ռուսական կայսրությունից փախչելու» հետխորհրդային առաջին տարիների մտայնությունը: Հատկանշական է, որ Հայաստանի քաղաքական շրջանակներում (որտեղ ավելի իրատեսական են մոտենում խնդիրներին) սկսել է գերիշխել այն մոտեցումը, որ եվրոպական և եվրասիական ձևաչափերում ինտեգրման գործընթացները միմյանց փոխլրացնող են, այլ ոչ՝ հակասող:

Միննույն ժամանակ, «ինտեգրման» խնդիրն ակտուալ է նաև տարածաշրջանային հարթությունում, և այստեղ հարկ է շեշտել, որ Հայաստանի հետ միասին աշխարհաքաղաքական և քաղաքակրթական «ջարդվածքի» եզրին կանգնած է նաև Վրաստանը, որը նույնպես, փոքր-ինչ ավելի բարվոք խմբագրությամբ, նույնպես «սահմանային երկիր է»: Տարածաշրջանային այս երկու հարևան երկրների ջանքերի հնարավոր համակարգումը միայն կնպաստի ավելի շահեկան եղանակով ինտեգրվելու «Եվրոպական համերգին»: Չի կարելի նաև բացառել, հաշվի առնելով այդ երկրում տեղի ունեցող փոփոխությունները, որ նման համագործակցությունը Վրաստանի հետ գուցե և հնարավոր դարձնի ձևավորել քաղաքակրթական բովանդակություն ունեցող տարածաշրջան, որը կձգվի Սուխումից մինչև Ստեփանակերտ:

Հայաստանի անվտանգությանն ուղղված ներքին մարտահրավերները

Հայտնի է, որ ցանկացած երկրի ազգային անվտանգության հիմնասյունն առաջին հերթին ներքին ռեսուրսներն են, և այդ առումով, թերևս, տեղին է հիշել չին ստրատեգ Սուն Ցզիի խոսքերը, թե «պարտությունը թշնամու մեջ է, իսկ հաղթանակը՝ մեր»:

Հայտնի է, որ ԽՍՀՄ փլուզման արդյունքում Հայաստանը բախվեց բազմաթիվ տնտեսական և սոցիալական խնդիրների, որոնց հետևանքները դեռևս հաղթահարված չեն: Մասնավորապես, այսօր հայկական հանրությանը խիստ մտահոգում են ժողովրդագրական խնդիրները: Այդ ոլորտում տիրող իրադրությունն արտահայտված է *Աղյուսակ 2-ի* առաջին, երկրորդ և չորրորդ ցուցիչների սյունակներում, այն է՝ ժողովրդագրական ազդեցություն, փախստականների և ներքին տեղահանվածների զանգվածային տեղաշարժ, մարդկային ռեսուրսի քրոնիկական և կայուն արտահոսք: Ինչպես հետևում է այդ տվյալներից, դրանց համապատասխան ցուցիչներն ունեն քանակական բավական բարձր ամբիւրներ, ինչը վկայում է ոլորտի անբարվոք վիճակի մասին: Այստեղ մտահոգիչ է ոչ միայն Հայաստանի բնակչության արտահոսքի փաստը, այլև այն իրողությունը, որ կտրուկ նվազել է (որոշ տվյալներով՝ մինչև 10 անգամ), այսպես կոչված, «բարդ աշխատանքով» զբաղվողների թիվը (վերջինիս տակ պետք է հասկանալ ամենատարբեր ոլորտների բարձր պրոֆեսիոնալ մակարդակ ունեցող մասնագետներին): Հատկանշական է նաև, որ Երրորդ հանրապետությունում գիտության և տեխնոլոգիայի վրա ծախսվում է տասնյակ անգամներ պակաս, քան Երկրորդ Հանրապետությունում:

Ստեղծված իրավիճակն անմիջականորեն կապված է պետության ընդհանրական հզորության հետ: Այդ հասկացության քանակական բնութագրման համար գոյություն ունեն տարբեր մեթոդներ (տե՛ս, օրինակ [9]), սակայն առավել կիրառական է ԱՄՆ ԿՀՎ վերլուծաբան Ռեյեմ Քլայնի բանաձևը [10], որտեղ մեր կողմից, հաշվի առնելով հայկական իրողությունները, լրացուցիչ ավելացվել է Սփյուռքի գործոնը հաշվի առնող D անդամը.

$$P=(C+E+M+D)(S+V)$$

որտեղ՝

- P - պետության հզորությունն է,
- C – երկրի բնակչությունը և տարածքը,
- E – երկրի տնտեսական հնարավորությունները,
- M – երկրի ռազմական հզորությունը,
- D – Սփյուռքի ընդհանրական ռեսուրսները,

S- ազգային ռազմավարության գործակիցը,

V- ազգային ռազմավարության նպատակներին հասնելու կամքը:

Բանաձևից հետևում է, որ երկրի հզորությունը կախված է ոչ միայն երկրի բնակչության մեծությունից (C), այլև նրա մտավոր և հոգևոր ռեսուրսներից (S, V), քանի որ առանց դրանց անհնար է մշակել ազգային արդյունավետ ռազմավարություն և, առավել ևս, հասնել այդ ռազմավարության նպատակներին: Նման հիմնախնդիրների լուծումը, թերևս, անհնարին է առանց Հայաստանի և Սփյուռքի համապատասխան ռեսուրսների համախմբման: Նկատենք նաև, որ առայսօր մեր պատկերացումները և գիտելիքները Սփյուռքի (երբեմն՝ նաև Հայաստանի) հոգևոր և մտավոր հնարավորությունների վերաբերյալ հեռու են ամբողջական լինելուց: Այդ առիթով տեղին է նորից վերհիշել ազգային անվտանգության ոլորտում մասնագիտական ենթախմբերի պատասխանատվության մասին: Կարծում ենք, որ մեր փորձագիտական-վերլուծաբանական հանրության առաջնահերթ խնդիրներից է Հայաստանի և Սփյուռքի հոգեմտավոր ռեսուրսների հաշվառումը և այդ ռեսուրսների համակարգված աշխատանքի կազմակերպումը՝ ուղղված ազգային ռազմավարական ծրագրերի մշակմանը: Մասնավորապես, պետք է մշակվեն ծրագրեր Հայաստանից բնակչության արտահոսքի կանգնեցման և մարդկային հոգեմտավոր ռեսուրսների էական ավելացման ուղղությամբ:

Միննույն ժամանակ, այդ բնույթի աշխատանքներ կազմակերպելը նույնպես դյուրին գործ չէ: Պետք է արձանագրել, որ Հայաստանի գիտահետազոտական համակարգը բավական կազմալուծված է, և այսօր բացակայում են այն գործիքաշարը և մեթոդաբանությունը, որոնք թույլ կտային Հայաստանի և Սփյուռքի փորձագետներին վարել արդյունավետ աշխատանքներ: Այդ նպատակներն իրագործելու նպատակով խիստ նպատակահարմար է ստեղծել Ցանցային հետազոտությունների ինստիտուտ (*ՅՀԻ, Reaserch Net Institute*), որը պետք է ունենա պետական և Սփյուռքի կառույցների հովանավորությունը:

Նոյեմբեր, 2012թ.

Աղբյուրներ և գրականություն

1. *Арутюнян Гагик*, Распад системы и формирование будущего, Ереван, 2011.
2. *Հարությունյան Գագիկ*, Միջուկային պատերազմ. հնարավոր սցենարներ, Գլոբուս #11, էջ 5, 2012:
3. *Հարությունյան Գագիկ*, Թուրքական միջուկային սպառնալիքը, Գլոբուս # 4, էջ 5, 2012: http://noravank.am/arm/articles/detail.php?ELEMENT_ID=649, http://www.noravank.am/rus/articles/detail.php?ELEMENT_ID=6451&sphrase_id=19499
4. *Մարջանյան Արա*, Միջուկային Թուրքիա, Գլոբուս #4, 2012, http://noravank.am/arm/articles/detail.php?ELEMENT_ID=6470, http://www.noravank.am/rus/articles/detail.php?ELEMENT_ID=6472&sphrase_id=19502
5. *Տեր-Հարությունյան Արտաշես*, Թուրքիայի միջուկային նկրտումների վերաբերյալ, Գլոբուս #4, էջ 17, 2012, http://www.noravank.am/arm/articles/detail.php?ELEMENT_ID=6383&sphrase_id=19497
6. *Мирзаян Геворг*, Имам не сдержал азарта, Эксперт, #30-31 (813), с. 69, 2012.
7. *Власова Ольга*, *Мирзаян Геворг*, Большая ошибка Турции, Эксперт, #42 (824), с. 18, 2012.
8. *Հարությունյան Գագիկ*, Եվրամիություն. նոր միտումներ, Գլոբուս, #6, էջ 3, 2012, http://noravank.am/arm/articles/detail.php?ELEMENT_ID=6580
9. Глобальный рейтинг интегральной мощи 100 ведущих стран мира (под научной редакцией проф. А.И. Агеева (Россия), проф. Г.Менца (Германия), проф. Р.Метьюза (Великобритания), М., Международная Академия исследований будущего, 2008.
10. *Балахонцев Н., Кондратьев А.*, Зарубежные методы оценки потенциала стран. Зарубежное военное обозрение, #11(764), с. 101, 2010.

ВЫЗОВЫ АРМЕНИИ В ГЛОБАЛИЗИРУЮЩЕМСЯ МИРЕ

Гагик Арутюнян

Резюме

Процессы в контексте «Арабской весны», развития вокруг иранской ядерной программы и Сирийская война дестабилизировали регион Ближнего Востока. По некоторым сценариям возможно нарушение сложившегося военно-политического баланса в регионе и усиление Турции. Амбициозные планы неоосманской элиты (формирование «Исламского НАТО», создание собственного ядерного оружия и т.п.), с учетом позиции этой страны по отноше-

нию к Армении (блокада границ, перманентные заявления по вопросу НКР и т.д.), превращают такой сценарий в серьезный вызов для Армении. Адекватной реакцией на это должна быть активизация усилий Армении в глобальных интеграционных процессах по цивилизационному признаку – в проектах Евразийского и Европейского союзов.

Другим вызовом для Армении является демографическая ситуация и снижение интеллектуально-духовного потенциала общества. Решение этих проблем возможно при координированной работе экспертов Армении и Диаспоры по разработке соответствующих национальных проектов. В качестве инструментария для решения этих задач целесообразно основать Сетевой исследовательский институт.